

CONVENIO DE COLABORACIÓN ENTRE A XUNTA DE GALICIA A TRAVÉS DA AXENCIA TURISMO DE GALICIA E A MANCOMUNIDADE DE TERRAS DE PONTEVEDRA PARA A REALIZACIÓN DE ACTIVIDADES DE PROMOCIÓN DO TURISMO NA COMARCA DE PONTEVEDRA

Santiago de Compostela, 10 de maio de 2016

REUNIDOS

Por unha banda, Dona María Nava Castro Domínguez, Directora da Axencia de Turismo de Galicia, en virtude do disposto no Decreto 34/2013, do 21 de febreiro, e conforme as facultades que lle confire o artigo 5 do Decreto 196/2012, do 27 de setembro polo que se crea a Axencia de Turismo de Galicia e se aproban os seus estatutos que desconcentran na titular da Dirección da Axencia a competencia para subscribir convenios de colaboración no seu respectivo ámbito competencial.

Doutra, a Mancomunidad Terras de Pontevedra e no seu nome e representación , na súa calidade de Presidente, ao abeiro das competencias que para vincularse neste acto se lle confire a Lei 7/1985, do 2 de abril, Reguladora das Bases de Réxime Local, e na Lei 5/1997 do 22 de xullo, de Administración Local de Galicia.

Interveñen en función dos seus respectivos cargos das facultades que, para convir en nome das entidades que representan teñen conferidas.

EXPOÑEN

Primeiro.- Que a Mancomunidad Terras de Pontevedra e unha administración pública de carácter local composta polos Concellos de Pontevedra, Marín, Poio, Pontecaldelas, Vilaboa, Cotobade, Barro e Campo Lameiro, que ten como obxectivo consolidar a comarca como un destino turístico diferenciado e de calidade dentro do panorama nacional e internacional.

Que nos Estatutos da Mancomunidad de Terras de Pontevedra dos Concellos de Pontevedra, Marín, Poio, Pontecaldelas, Vilaboa, Cotobade, Barro e Campo Lameiro, establécense como fins da mesma entre outros : “Turismo: fomento y explotación del turismo”.

Que os Concellos, segundo se sinala no Artigo 25.2 da Lei 7/1985, do 2 de abril, reguladora das bases de réxime local, teñen competencias en materia de turismo.

Que de conformidade co previsto no artigo 135 da Lei 5/1997, do 22 de xullo, de Administración local de Galicia, os concellos galegos terán dereito a asociarse en mancomunidades para a execución ou prestación en común, de obras, servizos e actividades da súa competencia.

Segundo. Que o artigo 148.1.18 da Constitución establece como competencias da Administración Xeral do Estado, que poderán asumir as Comunidades Autónomas, a relativa á promoción e ordenación do turismo no seu ámbito territorial.

Que a Comunidade Autónoma de Galicia ten competencias, con carácter exclusivo, tal e como se desprende do contido do seu Estatuto de autonomía, en materia de promoción e ordenación do turismo dentro da comunidade (artigo 27.21).

Que a Axencia Turismo de Galicia, segundo o Decreto 196/2012, do 27 de setembro polo que se crea a Axencia Turismo de Galicia e que se aproban os seus estatutos, é o órgano da Xunta de Galicia ao que lle corresponde o exercicio, entre outras, das competencias en materia de coordinación, impulso, xestión e execución das actividades de promoción do turismo.

Co obxecto de promover o turismo na Comarca de Pontevedra, as partes consideran esencial colaborar na realización deste Convenio xa que se trata dunha acción de interese común, cofinanciada polas mesmas e con beneficios conxuntos. Todo isto, englobase ademais no eido competencial da Axencia Galega de Turismo.

Terceiro.- As actividades relacionadas coa promoción, dinamización e fomento da riqueza e do turismo da Mancomunidade de Terras de Pontevedra contribúen á potenciación do Turismo na área do Xeodestino que integra esta Mancomunidade e supón unha continuación da colaboración entre ambas entidades realizadas a través do Plan de Dinamización Turística desenvolvido nesta área.

O obxectivo a acadar polas partes é a regulación das bases de colaboración para a constitución, posta en funcionamento e xestión, dunha serie de actividades para a promoción do turismo no ámbito da Mancomunidade Terras de Pontevedra a través da priorización de accións de promoción, difusión e dinamización dos recursos baseados na Arte Rupestre que é o recurso turístico máis característico da comarca.

Asemade procurarase a sensibilización tanto aos visitantes como aos propios veciños da zona sobre a importancia de preservar e poñer en valor o patrimonio cultural, histórico e arqueolóxico o que terá clara proxección turística coa correspondente incidencia económica nesta comarca.

Estas actuacións divulgarán a realidade e potencialidade da Comunidade Autónoma como receptora dun turismo de calidade e incidirán nun maior desenvolvemento e coñecemento no exterior.

En consideración ao anteriormente exposto, é vontade das partes asinantes a colaboración na xestión das actividades relacionadas, de acordo ás seguintes:

CLAÚSULAS

Primeira.- Obxecto do Convenio

É obxecto do presente convenio establecer as bases de colaboración entre a Axencia de Turismo de Galicia e a Mancomunidad Terras de Pontevedra, para a subvención de actividades relacionadas coa promoción, dinamización e fomento do Turismo que inclúa a realización das seguintes actuacións:

1. MELLORA NO ACCESO DIXITAL AOS RECURSOS TURÍSTICOS DOS CONCELLOS: “DESENVOLVEMENTO APP ARTE RUPESTRE”

Trátase da creación e posta en marcha dunha aplicación para dispositivos móbiles de realidade aumentada. Esta APP que permitirá visualizar en tempo real a través da cámara do noso teléfono, o mundo que nos rodea dun modo diferente e orixinal, aportándonos valor, utilidade e sobre todo co fin de poñer en valor e dar a coñecer o Produto de Arte Rupestre dunha forma interactiva que permitirá guiarnos por nós mesmos, así como mostrarnos a información do que estamos vendo e mellorando a experiencia do viaxeiro.

2. POTENCIACIÓN DOS PRODUTOS TURÍSTICOS: “POTENCIACIÓN DOS PRODUCTO TURISTÍCOS E NOVOS SEGMENTOS DE MERCADO”.

Seguindo un dos obxectivos propostos dende a xestión do PDPT TERRAS DE PONTEVEDRA, traballarase na potenciación do produto de Arte Rupestre buscando captar novos segmentos de mercado: o **Turismo Familiar**.

Realizaranse diferentes accións de promoción, dende a creación dun material promocional, unha audioguía do produto e presentacións para prensa especializada e axentes de viaxes. Todo o material adaptarase para web e a APP de realidade aumentada.

3. PROMOCIÓN DO DESTINO TURÍSTICO: “COMUNICACIÓN PARA A PROMOCIÓN DO TERRITORIO E OS SEUS PRODUTOS TURÍSTICOS”

Realización dun blog trip, invitando a 8 xornalistas/bloggers que serán protagonistas dos “paquetes turísticos” especializados na Arte Rupestre. Realizarase un *audiovisual* e a difusión do mesmo a través de web, canal You Tube, Vimeo e redes sociais.

4. COMERCIALIZACIÓN DO DESTINO TURÍSTICO “TERRAS DE PONTEVEDRA”: “PLATAFORMA DE PROMOCIÓN E COMERCIALIZACIÓN TURÍSTICA”

Desenvolvemento e a posta en marcha dunha plataforma de venta online de viaxes e estancias combinadas no Destino; a ferramenta permitirá unha xestión integrada de todos os servizos existentes e catalogados no destino. Os obxectivos que se acadarán son:

1. Promocionar online a integridade de recursos e oferta turística do destino a través dos viaxes combinados.
2. Permitirá chegar a máis clientes ao tratarse dunha reserva en liña non na propia axencia.
3. Comercializar online oferta combinada do destino.
4. Implementar no destino unha canle de promoción interno da oferta de servizos.
5. Xestión de reservas das empresas de servizos.
6. Xestión de clientes das empresas de servizos.
7. Xestión de pagos en liña ás empresas de servizos.

8. Ter acceso á información en tempo real.
9. Permitirá a calquera usuario (turista) coñecer e contratar os servizos turísticos dispoñibles no territorio.
10. Poñer a disposición do turista e dos intermediarios toda a oferta turística de xeito global.
12. Crear un punto único de concentración de oferta e demanda do destino, facilitando o consumo.
13. Crear novas relacións entre operadores privados.

Para a súa difusión, inclúese un **Plan de marketing on line** coa xestión das redes on line existentes do destino.

5. XESTIÓN E COORDINACIÓN DAS ACCIÓN DO PLAN: Os gastos desta liña serán asumidos pola propia Mancomunidade.

Segunda.-Financiamento.

O orzamento estimado para a Execución das actuacións recollidas na cláusula primeira ascende a cento dous mil novecentos quince euros (102.915,00 €) dos que a Xunta de Galicia, a través da Axencia de Turismo de Galicia, achegará con cargo os orzamentos xerais da Comunidade Autónoma para o ano 2016 sesenta mil euros (60.000 con cargo á aplicación 04A2.761A.760.3, na que existe crédito adecuado e suficiente, e que se aplicará para o pago dos gastos que se relacionan no anexo I.

A Mancomunidade Terras de Pontevedra e os Concellos integrantes da mesma levarán a cabo unha achega de corenta e dous mil novecentos quince euros (42.915,00 €) destinados a sufragar os gastos de persoal dedicado á xestión e coordinación das actividades obxecto deste convenio.

Terceira.- Compromisos da Xunta de Galicia.

A Axencia Turismo de Galicia achegará para o desenvolvemento destas actividades a cantidade total de sesenta mil euros (60.000,00 €), que se imputarán con cargo á aplicación orzamentaria 04A2.761A.760.3 dos orzamentos xerais da Comunidade Autónoma de Galicia do ano 2016.

De acordo co artigo 31.6 da Lei 9/2007, do 13 de xuño, de subvencións de Galicia e artigo 63.4 do Decreto 11/2009, do 8 de xaneiro, que a desenvolve, a Axencia Turismo de Galicia realizará a súa achega mediante anticipo do 100% da mesma, unha vez asinado o presente convenio.

Conforme ao artigo 65.4.c) do Decreto 11/2009, do 8 de xaneiro, polo que se aproba o Regulamento da Lei 9/2007, do 13 de xuño, de Subvencións de Galicia a Mancomunidade Terras de Pontevedra queda exonerada da constitución de garantía.

De acordo co artigo 26 da Lei de subvencións de Galicia non é posible promover a concorrência pública para a realización destas actividades posto que se trata dunha comarca que dende o punto de vista turístico é un referente en Galicia e fóra dela, cunha alta proxección turística baseada no patrimonio arqueolóxico. Estas accións enmárcanse nunha estratexia de continuar a desenvolver accións nos territorios que xa tiveron plans de dinamización ou excelencia turística tratando de manter a colaboración interadministrativa e facer destinos turísticos singulares e diferenciadores que especialicen a súa oferta turística para enriquecer o conxunto de Galicia.

Cuarta.- Compromisos da Mancomunidade Terras de Pontevedra

- Diseñar, coordinar e executar as accións obxecto do presente convenio, poñer todos os medios técnicos e humanos necesarios para o desenvolvemento do mesmo e asumir os gastos de persoal e correntes que orixinen a posta en marcha das actividades.
- Facer constar a colaboración da Xunta de Galicia – Axencia Turismo de Galicia- en toda a publicidade (impresa, audiovisual, ..) que xeren as actividades deste convenio e inserir a marca turística de Galicia segundo o establecido no manual corporativo da Xunta de Galicia.
- Comunicar á Axencia Turismo de Galicia a obtención doutras subvencións, axudas ingresos ou recursos que financien a actividade subvencionada procedentes de calquera administración ou entes públicos ou privados nacionais ou internacionais. Esta comunicación deberá efectuarse tan pronto como se coñeza e en todo caso, con anterioridade á xustificación da aplicación dos fondos recibidos.
- De acordo co disposto no artigo 40.1 d) do Decreto 11/2009, do 8 de xaneiro, polo que se aproba o Regulamento da Lei 9/2007, do 13 de xuño, de subvencións de Galicia, a achega económica prevista neste convenio será compatible con outras subvencións,

axudas, ingresos ou recursos para a mesma finalidade, procedentes de calquera Administración ou entes públicos ou privados, nacionais, da Unión Europea ou organismos internacionais.

- En ningún caso o importe das subvencións as que se refire o parágrafo anterior poderá superar, no seu conxunto, o custe da actividade subvencionada, ao abeiro do disposto no artigo 17.3 da Lei 9/2007.
- Acreditar ante a Axencia Turismo de Galicia o cumprimento do deber de remisión ao Consello de Contas das contas xerais de cada exercicio, conforme o indicado no artigo 4 do Decreto 193/2011, do 6 de outubro, polo que se regulan especialidades nas subvencións ás entidades locais galegas.
- No suposto de adquisición, construción, rehabilitación e mellora de bens inventariables o beneficiario deberá destinar os bens ao fin concreto para o cal concedeuse a subvención por un período mínimo de cinco anos en caso de bens inscribibles nun rexistro público, e de dous anos para o resto dos bens.
- Reintegrar total ou parcialmente, a subvención percibida no suposto de incumprimento das condicións establecidas para a súa concesión, e a exixencia do xuro correspondente desde o pagamento da subvención ata a data en que se acorde a procedencia de reintegro cando concorran algunha das causas sinaladas no artigo 33 da Lei 9/2007, do 13 de xuño, de subvenciones de Galicia, e a obriga de facilitar toda a información que se lle requira pola Axencia Turismo de Galicia en relación coa xustificación do convenio, e pola Intervención Xeral da Comunidade Autónoma de Galicia, o Tribunal de Contas e o Consello de Contas, no exercicio das súas funcións de fiscalización e control de destino de axudas.
- Dar o seu consentimento para a publicación da axuda concedida no Diario Oficial de Galicia, na páxina web oficial da Axencia Turismo de Galicia e nos rexistros públicos, de acordo co establecido no artigo 15 da Lei 1/2016, de 18 de xaneiro, de transparencia e bo goberno, no Decreto 126/2006, do 20 de xullo, polo que se regula o Rexistro de convenios da Xunta de Galicia e no Decreto 132/2006, do 27 de xullo, polo que se regula os rexistros públicos creados nos artigos 44 e 45 da Lei 7/2005, do 29 de decembro, de orzamentos xerais da Comunidade Autónoma de Galicia para o ano 2016.

Quinta.-Xustificación dos investimentos

1. A xustificación da execución das actividades subvencionadas realizarase segundo a modalidade de conta xustificativa de acordo co disposto no artigo 28 da Lei 9/2007 de subvencións de Galicia e o artigo 48 do Decreto 11/2009, do 8 de xaneiro, polo que se aproba o seu regulamento, para o que a Mancomunidade deberá presentar:

- Informe ou memoria global sobre as actividades realizadas.
- Certificación detallada dos gastos expedida pola intervención ou órgano que teña atribuídas as facultades de control da toma de razón en contabilidade e do cumprimento da finalidade para que foi concedida, na que se consignarán os importes executados e a relación de facturas correspondentes así coma o cumprimento do compromiso de recoñecemento de obriga ou pagamento no seu caso.
- Certificación emitida pola Secretaría da entidade local acreditativa do cumprimento da normativa de contratación do sector público, acompañada de copia simple do expediente de contratación realizado para levar a cabo as actuacións, sen prexuízo das comprobacións que se poidan facer sobre os orixinais; no seu caso achegaranse os tres orzamentos que en aplicación do artigo 29.3 da Lei de Subvencións de Galicia, deba ter solicitado o beneficiario.
- Declaración responsable do órgano competente da entidade de estar ao día no cumprimento das obrigas tributarias e fronte á Seguridade Social, e de non ter pendente de pagamento ningunha outra débeda coa Administración pública da Comunidade Autónoma. Estas declaracións presentaranse con anterioridade á sinatura do presente convenio.
- Facturas, orixinais ou copias compulsadas, correspondentes á execución das actividades obxecto do convenio.
- Transferencias bancarias ou documentos acreditativos dos pagos realizados, orixinal ou copia compulsada, correspondentes á execución do obxecto do convenio.
- Unha relación detallada de outros ingresos ou subvencións que financiaran a actividade subvencionada con indicación do importe e a súa procedencia.
- No caso de ser financiadas as actividades, ademais de coa subvención, con fondos propios ou outras subvencións ou recursos, deberá acreditarse na xustificación o importe,



procedencia e aplicación de tales fondos ás actividades subvencionadas, de conformidade co disposto no artigo 28.6 da lei 9/2007, do 13 de xuño, de subvencións de Galicia.

- De ser o caso, os tres orzamentos que se requiren en aplicación do artigo 29.3 da Lei 9/2007, do 13 de xuño, de subvencións de Galicia.
- No seu caso, carta de pago de reintegro no suposto de remanentes non aplicados así como dos intereses dereivados destes.

2. Consideraranse subvencionables os gastos que, respondan de xeito indubidable á natureza da actividade subvencionada e de acordo co artigo 29.2 da Lei de subvencións de Galicia considerárase gasto realizado o que foi efectivamente pagado con anterioridade á finalización do período de vixencia do convenio.

3. O prazo para xustificar por parte da Mancomunidade Terras de Pontevedra da aplicación dos fondos percibidos remata o 15 de decembro de 2016. De non xustificarse en prazo a cantidade total subvencionada, a Mancomunidade deberá reintegrar proporcionalmente o non xustificado, e a Xunta de Galicia minorará a súa achega proporcionalmente ao non xustificado, sempre e cando se acade o obxecto do convenio.

Non obstante, non se entenderá incumprida a obriga de xustificación das actuacións obxecto deste convenio no caso de variacións das contías previstas nas distintas partidas establecidas no orzamento estimado no anexo, cando obedezan a razóns xustificadas e as actuacións que se levaran a cabo garden relación directa co obxecto do presente convenio, e sempre que se xustifique o importe total.

4. Consonte o disposto no artigo 17.4 da Lei 9/2007 de subvencións de Galicia toda alteración das condicións tidas en conta para a concesión da subvención, poderá dar lugar á modificación do Convenio.

SEXTA.- Prazo para a realización do pagamento

O prazo máximo para a realización do pago comprometido, queda fixado no día 31 de decembro de 2016. O prazo para a reclamación por parte da Asociación en caso de incumprimento do pago comprometido pola Axencia de Turismo de Galicia, queda fixado nun período máximo de 10 días dende a finalización dos prazos establecidos no punto anterior.

Sétima.- Comisión de Seguimento

Noméase unha comisión de seguimento e control integrada por dous membros de cada unha das dúas partes. Esta comisión será a encargada de solucionar as controversias que se poidan suscitar na interpretación do convenio.

Composición: Dous representantes da Axencia de Turismo de Galicia e dous representantes da Mancomunidade Terras de Pontevedra.

Presidencia: A Directora de Turismo de Galicia ou persoa en quen delegue.

Secretario: O presidente da Mancomunidade Terras de Pontevedra ou persoa en quen delegue.

O funcionamento da Comisión axustarase ao disposto na Lei 30/1992, de 26 de novembro, de réxime xurídico das administracións públicas e do procedemento administrativo común.

Os acordos da Comisión adoptaranse por unanimidade e serán executivos e vinculantes para as administracións integradas no convenio.

Corresponderán á comisión de seguimento as seguintes funcións:

- Elaborar e aprobar as accións que se detallan no anexo ao presente convenio.
- A interpretación do presente convenio, resolvendo todas as dúbidas que poida xerar a súa execución.
- O seguimento da execución do convenio, sendo informada polas administracións asinantes das accións realizadas.

As modificacións do convenio adoptaranse por acordo expreso e escrito das partes asinantes, e de acordo cos trámites que esixa a normativa vixente.

Oitava.- Vixencia do convenio.

Este convenio entrará en vigor ao día seguinte a súa sinatura e estenderá a súa vixencia ata o 15 de decembro de 2016. Non obstante a cláusula anterior, o presente convenio ampara as actuacións realizadas desde o 1 xaneiro de 2016. A Mancomunidade Terras de Pontevedra como entidade executora e xestora das actuacións, será a responsable do mantemento en

todo momento e trala finalización da vixencia temporal do mesmo, das finalidades propias do Convenio.

Novena.-Natureza xurídica e xurisdición competente.

Este convenio ten natureza administrativa, sendo competente para entender dos litixios que puidesen xurdir respecto da súa interpretación e execución a xurisdición contencioso-administrativa, e queda fora do ámbito da Lei 30/2007, do 30 de outubro, de contratos do sector público que os exclúe expresamente no apartado c) do parágrafo primeiro do artigo 4º.

Para todo o non previsto expresamente no texto deste convenio será de aplicación o réxime determinado pola Lei 9/2007, do 13 de xuño, de subvencións de Galicia, o Decreto 11/2009, do 8 de xaneiro que a desenvolve, e en canto non se opoña ao establecido na antedita Lei 9/2007, a Lei 38/2003, do 17 de novembro, xeral de subvencións e o Real decreto 887/2006 que a desenvolve, a Lei 1/2016, do 18 de xaneiro, de transparencia e bo goberno e demais normativa que sexa de aplicación.

Décima.- Resolución

O presente convenio resolverase polo incumprimento total ou parcial dalgunha das cláusulas que o regulan.

Lido polas partes, por si mesmas, e como proba de conformidade co expresado no presente Convenio, asínano e rubrícano por triplicado exemplar, no mesmo lugar e data que se indica ó comezo.

POLA XUNTA DE GALICIA

POLA MANCOMUNIDADE

TERRAS DE PONTEVEDRA

Nava Castro Domínguez

ANEXO I

ACCIÓNS	ORZAMENTO
1.DESENVOLVEMENTO APP ARTE RUPESTRE	13.915,00 €
2. POTENCIACIÓN DOS PRODUCTO TURÍSTICOS E NOVOS SEGMENTOS DE MERCADO	8.228,00 €
3. COMUNICACIÓN PARA A PROMOCIÓN DO TERRITORIO E OS SEUS PRODUTOS TURÍSTICOS	12.705,00 €
4. PLATAFORMA DE PROMOCIÓN E COMERCIALIZACIÓN TURÍSTICA	25.152,00 €
<i>TOTAL APORTACIÓN XUNTA</i>	<i>60.000,00 €</i>
5. XESTIÓN E CCORDINACIÓN (aportación Mancomunidade)	
<i>TOTAL APORTACIÓN MANCOMUNIDADE TERRAS DE PONTEVEDRA</i>	<i>42.915,00 €</i>
TOTAL CONVENIO	102.915,00 €